

## L'ISLE DE IAPPON.

**L**A longueur de ceste Isle contient pres de deux cens lieües : mais la largeur n'y respond nullement, elle s'estend seulement en quelque endroit à dix lieües, pour le plus à trente. Il n'y a rien de certain escrit de son circuit. La terre est pour la plus grande part neigeuse & froide, & non gueres fructueuse, l'air y est sain avec la saison. En Septembre ils moissonnēt le ris, (cette viande est cōmune à tous) en quelques lieux aussi ils cueillent du bled en May : & ne font pas d'iceluy du pain selon nostre maniere, mais vne espece de soupe, que les Italiens appellent *Potencia*. Le beurre leur est incognu. Ils n'vsent point d'huile, mais de ceste graisse, qui des baleines est jettée au bord de la mer. Au lieu de lumiere ils vsent de fascines, & en quelques lieux d'estrain. Ils font le pavé de nattes nettes & enflées, ainsi qu'un coutil, sur icelles ils dorment, mettans sous la teste vne pierre, ou vne piece de bois, & y prennent leur repas, appuyez sur leurs genoux, assis sur leurs jambes. Ils entrent la sale du repas deschaufez, à fin qu'ils ne souillent point le planche. Les moins aisez vivent ordinairement vers la mer d'herbes, de ris, & de poisson. Les riches font le banquet somptueusement & avec appareil ; a chascun met lon change à chascun des conuiez sa table sans linge ou nappes, laquelle est de cedre ou de pin, presque de la hauteur d'une paume. Ils ont des grands temples & des monasteres somptueux, tant d'hommes que de femmes. Ils vsent de maistres de religions, de ceux qui sont appelez Bonsi. Entre leurs dieux qu'ils adorent humblement sont Adama & Xaea, ainsi nommez. Mais ils en ont des autres, desquels ils attendent les biens de la vie future, & les appellent Fotos.